

QVÆSTIO MEDICA

CARDINALITIIS DISPUTATIONIBUS
manè discutienda in Scholis Medicorum
die Jovis 27. Martii.

M. ÆGIDIO LE BEL Serenissimæ Aurelia-
nensium Ducissæ Medico primario, Præside.

An ab animi pathematis sanitas deterior?

I.

TOTUS homo ubique passio est; omni ejus parti, li-
cet non omnibus ex æquo, obvia; cunctis impertita
animalibus exquisito sensu & motu, imò impotentior
acutiori ratione præditi, ad mali fugam, bonique studium.
Sua idcirco cuique est animanti mirabilis partium compages,
brutis quibusdam non minus stupenda quàm homini; cuique à
parentibus cum semine traduces animi; cuique par corporis &
animi per spiritus vinculum; sensuum & rationis idem nexus;
fors eadem necis & vitæ: nullumque non intelligit sapitque
animal; interdum minus homine fallitur & insanit bellua, cui
si desit sermo, quidni organi culpâ: illi demas immortalitatem
animæ (cujus cœlestis origo) sacris sancitam paginis, à quibus
recedere nefas & piaculum, nihil est aut parum discriminis ho-
minem inter & belluam: in utroque motus à musculis, sensus à
nervis, quos edunt corpuscula spirituum nomine insignita; qui
dum aliter atque aliter ab objectis excitantur, excubiis aut in-
ternunciis similes, alias atque alias rerum renunciunt sensatio-
nes; aut placidas, undè gaudium; aut graves, undè dolor. Quor-
sum? hic ficulneæ rerum species à veteribus malè excogitatæ:
reportatum cerebro talem aut talem motum accuratè per-

pendit animal, volutatque animo; si jucundum, lætatur & colit; si molestum, contristatur & fugit; si volupe, admovet corpus ut infectetur; si triste, removet ut aspernetur & declinet: illincque pro diversis objectorum motibus, quibus foris intrò, intrus foras concitantur spiritus, varii suscitantur affectus. Cave tamen credas, machinæ instar nihil ex se molientis, impelli animal; non adigunt objecta, sed pelliciunt; movent, nec necessariò promonent; putato potius judicem æqui bonique consulturum; sic quod uni ingratum, alteri gratissimum; quod uni odio est, alteri amor. Si efflagitas quid & undè passio, in promptu responsio, motus est & quidem valens appetitus sentientis seu rationalis ex apprehensione boni & mali cum insigni cum corporis tum animi mutatione non naturali. Hinc nemini data perfecta sanitas & sapientia, quia nulli *ἀνάθεα*, nè quidem Stoica, quæ cachinnis digna æquè impossibilis ac inutilis. Cupiditatem in jecore, *θυμω* in corde, appetitionem brutis communem in cerebro, cupediam in ventriculo, & in testibus libidinem, tanquam in propriis constitutas peculiariter sedibus, tibi suadeas vera signa; passim sparguntur & ipsæ: irascitur non nunquam caput, & remulenter aut luxuriosè concupiscit, pacato corde, languido hepate, & funeratâ venere; adultera mens est illibato corpore; & crudeliora voluit facinora puris integerisque manibus.

I I.

UT corpori, sic animo nec parcut morbi nec Parcæ; illo pœnè illæso, hic irâ furit, timore stupet, verecundiâ cespitat, amore insanit, mœstitiâ languet, ambitione delirat, odio vesanit, zelotipiâ bacchatur, cunctarumque affectionum communione, & cognatione frangitur, & esse desinit: quarum exasperatio, ægritudinis nomine apprimè donata, natalium & *ἰδιοσυμπετοῦ* est soboles; undè gaudere debent; si qui sunt benè nati *ἀνάθεα*, raræ aves in terris, diique potius quàm homines: trahit sua quemque voluptas etiam nolentem; & quempiam fugat malum etiam volentem. Quò exquisitiori sensu disciscunt animalia, eò perturbationibus magis exardescunt, quas ipsa effrœnatiùs exasperat vegetior ratio: hinc nullus est in homine ingenioso modus; rustici urbanis, urbani aulicis temperatores; delirantes & stupidi nihil persentiscunt. Quid ergo profunt ho-

mini mens, animus, ingenium, quæ idem sonant, brutisque communia; si innumeras alias quàm à natura datas calamitates suâ culpâ sibi asciscat: nudus collachrymanque conscendit terram, omnibus animi affectionibus nullâ curabilibus arte irretitus: in pueritia meticulosus, in pubertate verecundus, in adolescentia libidinosus, in juventute ambitiosus, in constanti ætate negotiosus, in senectute avarus. Ab incunabulis, dum fugit cum lacte pravos fatuæ nutricis mores, seu affectiones, vagitibus divexatur: à pubere artibus, negotiis, studiis, vel armis, aut studiosè, aut odiosè captus, discruciat; & alios distorquere discit: tandem velut nolit, ut vivat, ut ditescat, vigilet, sudetque necessum est. Huc illum adegit natura, redegitque fortuna, ut citra sudorem & laborem fame vel paupertate pereat. Jam curæ palàm emergunt infausti hujus ominis avertendi gratiâ, nullaque non prodit malorum mensura. Hunc furor Martis concitat inanis gloriolæ cupidum: illum scindit auri sacra sitibundaque fames: nonnullum angit inexplibilis dominandi cupidus: in foro lites rodunt verba vendentem rabulam: exercent rura colonos ultra sudorem: in ædibus anxietates inauspicati connubii premunt: purpuratos iustitia terris exul torquet sibi conscios: dilaniantur dum præcipientes ruunt aulici, vanâ & tœdiosâ gratiarum expectatione decepti: mercatorum aviditatem deludit aviditas: lacerat dum fallit aleatorem imò & veteratorem spes incerta lucri, alienique cupida boni: regesque gemunt sub pondere regni: fortunamque sui cuique mores & passionem parant. Næ tu ergo quæsieris, quam mihi quam tibi sortem natura dederit; expende animi perturbationes, in quas mens inclinata recumbit, quarumque impetus cuncta ministrat mala: affectibus agimur; nec sollicitæ possunt curæ mutare ratos animi motus; quidquid patitur mortale genus; quidquid facimus, venit ex illis; primusque dies dedit extremum.

I I I.

UT ætatibus, sic sexui, regionibus, locis, temporibus, tempestatibus, conditionibusque suæ sunt propriæ & peculiariter connexæ animi commotiones; cogitationum, opinionumque hominis authores: (primus in orbe deos fecit timor;) consiliorum ejus regulæ: (video meliora proboque deteriora sequor, fatur Medea:) actionumque leges: (est pro ratione volun-

tas, & sunt pro voluntate animi affectus:) qui ita in humanam veniunt carnificinam, & sanitatis detrimentum, ut tunc sui tantum juris videatur animus, cum sui non est compos. Fœminas viris ad eos propensius proclives, fustulit gaudium; homines interimit mœror; utrosque è medio tollit metus: fœminis, quibus pulchritudo, unica cura; amor, unica sollicitudo; libido, unicum opus; pro naturali dote, vitrea fragilitas, & in levitate constantia; fastus inest, sequiturque superbia formam; nec mora nec requies contemptæ injuriæ formæ. Viros scævus honos jugulum ostentare adigit: virorum renovat per damna famem exlex & ingeniosa gula lagenas inter & comotationes: urit utriusque miserum ambitio pectus, quâ jura pudorque, nec conjugii sacrata fides arcent fœminas, & quæ viros cogit vestibulis foribusque potentum excubare, & sanitatis dispendio commercia poscere honorum. Nec mirum si vita brevis, quibus est plena curis, hoc est animi perturbationibus; quibus, inquam, casta fides, ut Pœnis, hodiè non firmior Anglis; inexplibilis avaritia, ut Arabibus, Hollandis nunc familiaris; innata temulentia, ut Thracibus, ad septentrionales incolas hoc tempore delapsa; vanitas immoderata, ut Græcis, Hispanis impræsentiariûm intima; indefessâ luxuria & mollietis, ut Leontinis, quibus tota post modum obruta fuit Italia; sollicitaque ambitio, & præceps lubricusque bellandi cupido, ut olim Romanis, ad Gallos hoc sæculo devoluta. Quid plura? omnis regio, omnis civitas, omnisque populus variis scætet cupiditatibus, affectionibusque, quarum pro temporum vicissitudine novo immergitur æstu; sic postridiè Roma jugulat, quem pridè suspiciebat & deperibat Cæsarem: sic vere animantium natura libidinis cestro percita, friget hyeme: sic dives fastu, jactatione miles, perjurio leno, adulatione aulicus, loquacitate sophista, fucatâ pietate hypocrita, larvato pudore impudens, personatâ pudicitia mœcha, ementitâ emptâque nobilitate plebeius, & quisque tandem suo torquetur genio & accisino, cruciantque leves animum & corpora causæ, & quocumque aspicias nihil est nisi mentis imago perturbata.

I V.

NATURA, nulli animanti noverca; brutis pro magistrâ, arte, lege, & medicinâ, errat rarenter; sæpiculè aber-

rat in homine: quòd hanc ducem non insequatur, sed insidiosæ
 pareat rationi. Hinc undecumque huic patet amplissima cala-
 mitatum sèges, quas me herculè à se amoveret, si hanc benè
 monentem auscultaret; sic innocens brutis edacitas, hominum
 plus jugulat gula quàm gladius: sic Hirco libido, Delphino las-
 civia, Passeri salacitas, Sui bulimia non officiunt, hominèmque
 interimunt: qui virtutis & vitii, eruditionis & inscitiae, pauper-
 tatis & divitiarum, iniquitatis & justitiae, necis denique & vitæ
 indefinenter jactatur certaminibus: quem, inquam, devorat
 tædium, spes vana rodit, absument mœstitia, conficit livor, so-
 licitant confunduntque opiniones, terrent jura legesque, for-
 tuna torquet, cruciat fati pavor, atque exest anxius angor,
 ignota ferè nec infensa belluis pathemata: O ter quaterque bea-
 tas felicesque animantes, quas affectionum harumce cura aut
 parum aut nullatenus angit: & quæ dum hominis insunt animo
 gehennæ, ejus corpori insident tormenta, susque deque, horsum-
 que vorsum spiritus exagitant, aut eorum remorantur impetum;
 sanguinis motum plus æquò festinant, ejusque dant vitio sub-
 stantiam; calorem nativum præter naturalem certumque mo-
 dum accendunt; corporis œconomiam & temperiem invertunt,
 omnemque morborum lernam invehunt. Hos vincere & vincere
 Dæmones educatos ne tentes; labor est improbus, & humanæ
 supra fortis opus: deorum est, motos animi componere fluctus;
 absit ut dicam heroum, videlicet Alexandri, unus cui non sufficit
 orbis, quiq; ardet, æstuat, furitque alterius mundi victoriâ, &
 de quo etiam indomito actum est ad Bacchi Venerisque conspe-
 ctum. Nec tuis confidas virtutibus, quæ affectibus haud sunt im-
 munes: imò suâ cuique affectioni debetur virtus, ambitioni ma-
 gnanimitas, vanitati sapientia, utrisque sæpè sapius pietas, con-
 tumaxque religionis zelus, iræ fortitudo, metui castitas, philantia
 temperantia, verecundiæ modestia; ne quid dicam præterea: ip-
 samet virtus eximiae temperiei proles, affectio est, quæ noctes at-
 que dies animum intimaque penitus medullas gloriæ vorat stimu-
 lis; undè ut gaudii luctus, sic sapientiæ stultitia, pariterque virtu-
 tis vitium occupat extrema. Hoc in vasto perturbationum gurg-
 ite, tantis pertæso ærumnis superest homini naufrago lætitia,
 sola salutaris affectio, dum ponat modum lætis; capitale enim fuit
 quibusdam nimium titillari. Cedat ergo luctus atrox gaudio; dum

fata sinunt, vivat hilaris & exulter. Vis benè valere, sanari, beari, læteris: vis diu & dulcè vitam degere, curas tolle graves; & irasci crede fatale, unà & contristari: voluptari & lætitiæ indulgeas; dummodo ne quid nimis; carpe diem; Heracliti irride planctus; sit denique tibi pro omni affectione, sapientiâ, & medicinâ gaudium, & si lubeat Democriticum.

V.

CADUCA valetudo, suspectaque hominis sanitas, cujus impatiens sui ager est animus: læviunt in corpus alternæ passionum vices; & excepto gaudio, vel levissimus earum motus officit, afficit impetus, insicit excessus, altæque agunt morborum radices. Quid? sæva Cupido tragœdiarum non movet in corpore ac in animo, dum morborum ut malorum scæter iliade; est flamma medullas, & secum serpit in viscera vulnus: furente amore huc & illuc feruntur & profiliunt spiritus; pulsus inæqualiter spe metuque inæqualis, amatorius nuncupatus; per venas meat visceribus ignis mersus; qui sanguinem tenuat, ultrò calfacit, comburitque; quo æstu tacito torrentur humores: hinc fœdat amantes pallidus color, nec somni faciles; adducitque curem macies; languet ciborum appetentia; depravatur concoctio; hysterica læviunt symptomata; & infamis libidinis scenam adornat periclitata medullitùs Syphilis, nullis radicibus medicabilis herbis. Irâ venæ tument, genæ rubent aut pallent quod pejus, scintillant oculi; quæ tegitur nocentior, furit feritque effroenis, mentem subigit, amovetque; exurit calorem nativum, aut dissipat; bilis, quæ exæstuat irâ, maximus proveniunt; pulsus citior, febres diariæ & tertianæ frequentes, putridæ quoque non rarò invalescunt. Dum mens formidine pressa, obstupet; rigent comæ, & vox faucibus hæret; frigidus sudor occupat artus; ossa quatit horror; vires effictæ exolvuntur; pedibus tamen timor addidit alas; derepentè canescunt expavidi; terrore concidunt mœriculosi; vitamque sæpè cum morte commutant; quid pejus Epilepsiâ, ullâ fere ineluctabilis arte, quam pueris nec rarò ætate provectioribus invehunt tercula-menta. Tristitia, humanæ vitæ venenum, pedetentim corpus conficit; calore nativo ad proprios lares refugo, cor comprimitur; hinc fugit ore color; lentescit arteriæ motus; spirituum, cruoris & humorum commeatus intercipitur; hinc frequentes

febres, præsertim quartanæ, Icterus, Cacochymia, uteri Phlegmone, Strangulatus, Abscessus, Schirrus, Ulcus, Carcinoma, Cancer, Melancolia, Lycantropia, Epilepsia. Odio torquetur pectus, divellitur stomachus, edulia putrent, corrupta evomuntur, pulsus minor, celer, & inæqualis, ructus nidorulentus, nausea, vomitus. Fallit unumquemque credula spes, desiderii assecla; cujus desultorio motu saliant spiritus, huc & illuc ruunt velocius; citatior sanguinis motus, effervescit ejus substantia, fitque nequam, & alendis partibus impar; undè Lipothymia, Syncopes, Rhumatismi. Qui ergo fieri potest ut rectè valeat & sanitate fruatur amore incensus, metu perculsus, spe inquietus, moestitiâ fessus, odio turbatus, percitus irâ, livore tortus; sanitas abest turgida morbis; nebula mens est vinctaque frenis, hæc ubi regnant.

Ergo ab animi pathematis sanitas deterior.

Afferebat Parisiis GUYDO-ERASMUS EMMEREZ,
Parisiinus Baccalaureus Medicus, A. R. S. H. 1681.

P A R I S I I S,

Apud Franciscum Muguet, Regis & Facultatis Medicinæ
Typographum.